

武林往哲遺著

奚囊蠹餘卷之十八

明 仁和張瀚撰

祭文

祭包孝肅公文

廬郡本宋龍圖學士孝肅包公故里城南有讀書臺土人呼爲香花塋莫詳所自公圖像告身遺舄在焉某始至謁像旣訝其大異昔聞復厭遊觀者會飲歡呼褻狎非禮乃建亭堂前奉公於中令不可狎旣又題其臺曰流芳爲文以祭之曰嗚呼天下事以意想擬人必失其實以憤激稱名鮮得其理公風裁勁節歷世世罔不企慕雖愚賤童稚皆知之至繪圖貌像則備極奇恠今觀

遺像乃清雋古雅殊無異於人人議擬公行輒取廉刻
深文發姦摠伏至考其實乃敦大體黜慘酷殊無戾乎
中和然後知習俗所傳皆曲億深索激於時者也宋以
忠厚立國其敝也流而爲弱縉紳雍容相諛悅公獨持
骨鯁務尊主庇民不爲雷同附和以坐鎮流俗故天下
取立儒廉禎之意獨以嚴厲歸之而畧其博大流傳旣
久匠氏務極嚴厲爲狀差溫雅卽慮弗肖宜乎奇恠之
形嚴猛之政愈傳愈失愈遠愈信且堅也公嘗疏戒天
下觀察使務存體要無事深求焉有以此倡言朝著顧
自食其言卽是可以槩公之行誥云夷齊不念舊惡聖
人不先介而亟稱其量懼未覩其全也則天下未及覩

公之全亦久矣余忝刺公郡仰公汗顏欲因蠶測用以爲質英靈不昧尙默啟所蔽以陰惠公里也

重瘞古冢文

嘉靖丙午仲春廬郡東北郊盜發古冢二弃骸穴外易材於市吏逐得旣正典刑仍爲治棺收瘞故所郡守某遣大使朱芾持酒肴祭而慰之曰吁嗟乎何人世系無傳生當何代壽夭德凶男女富貴杳不可知顧茲封砌完密材木堅美應非常人豈形生猶豐盛之年終嗣絕在衰微之後已致愼乎葬埋遂厄窮而莫守邪荒原蔓草上下牛羊常祀久廢濡雨隕霜已足爲生人之憐傷矣又以土人悖戾罹茲慘惡啟枯朽於黃泉暴泥砂之

白日彼誠見利以忘害幻軀旣委其何恤莫謂生前之不修實亦廢興之數值也守念政不格於頑悍因之熱中然尤情難恕於同胞重爲此賴今來瘞汝庶幾有知歆此憫惻永依原魄無因爲厲

祭長姊文

嗚呼悲夫茫茫天道果可測邪福善禍淫栽培覆傾夫順以信天人祐助稽古斯言皆虛語耳不然孰謂秉德如姊不俾之壽又孰謂有子克孝卒無應耶方吾姊在室余諸弟妹皆幼將順寒燠怡吾親心書史伎藝成吾親教撫翼同氣濟弱扶穉均吾親愛遺惠種種筭而千歸流涕牽衣情傾少長乃今二十餘年吾弟妹時時興

言猶酸心不已孰謂吾姊奄逝永隔幽明吾弟妹摧裂
肺肝攀號可但已邪往年先安人見背余自南水曹匍
匐歸廬吾姊每慟哭欲絕旣而積氣沈鬱宿中乳毒乘
哀毀卒發時召醫者有難色余竊謂吾姊以孝思得之
雖厲不爲害胡爲乎天不監于孝女竟以殞其生邪吾
姊有二子皆穎敏純恪比侍疾時刻不離躬極勞瘁乞
醫投餌籲天變食甚至吮吸潰積刳肌體爲飲以進經
年如一日余見之未嘗不咨嗟歎服謂其必能全母胡
爲乎天不監于孝子竟無益於死邪嗚呼悲夫藥藤療
風石英全患姊之二子宜無愧於斯人天果不可測矣
德基五福賢者永遐姊之仁孝夫何歉於斯言理果不

足信矣天不可測理不足信信乎吾姊宜天也余何忍
言余何忍言惟德在人不朽惟子顯親不死孝慈溫惠
無間尊卑威鳳伏龍仁見翔翥茲天道在遠猶邇吾姊
得自慰於重泉而亦弟輩藉以少慰哀思者也

祭朱母文

梁分厚裔吳傳茂族令澤潛流芳華煒郁時凝坤載迺
滋異育誕啟玉儀朗宣蘭馥教崇維四藝精踰六是異
凡媛是基永福好迷君子卓哉元谷志並鵬騫道隨龍
伏疇能曲慰頓輕榮祿天褫其儔矢心柏舟植節明義
振靈承休紹揚先烈貽厥孫謀孫謀允臧彰志闡幽秉
心摛藻石介川流式爾前徽壯于帝猷方隆遐祉奄逝

莫留萊雛失綵報劉養弃斯茲生榮耀之慶施鳴呼哀
哉維天難測惟命不易聚散如然死歸生寄夫復何言
所要不愧宜家者睦明分者智節懷者貞教成者義有
美克家亦終繼志永慰重泉冥冥不昧

祭魏令孫禹麓文

伊會稽之名岳實神禹之舊疆帶三江而襟海誕聖哲
而興王緬自昔以逮今紛懋實而開芳嗣孫令之挺出
殆鍾靈而降祥蚤誦法乎典謨振清響於琳琅恥白駒
之優游指青雲而激昂鳳穴英飛於桐嶧龍門角奮於
桃浪劍光騰於出匣錐穎脫於處囊臨洎作宰惠此魏
方允恃允怙爲紀爲綱歌聲聞於武城花陰滿於河陽

飄仁風於畿輔，馳妙譽於嚴廊。列宿方耀，曷掩其光？
貿易罷鄭人之市，大音絕單父之堂。翱翔未離乎叢棘，蔽
芾徒詠乎甘棠。嗟哉哲人，罔不盡傷。余昔射策同舉於
鄉，飄蓬久歎於契闊。彈冠初慰于相慶，僅十年而一遇，
不再見而遽亡。苟禍善猶難測，人何恃於彼蒼？若夫脩
短命定於不易，又奚恠乎不俾之壽？臧嗚呼禹麓身天
名揚，樹偉績於明時，託不朽於文章。已多取諸造化，復
何憾乎靡常？越嶠雲迷漳河水，泱泱悠悠旅櫓孤寡相將。
縱達觀於聚散，情胡忍于頓忘？薄卹爾後，慰爾冥茫。永
訣臨舟，雨泣數行。

祭十二弟子德文

嗚呼余聞弟之變且三月矣每一念至痛不能言憐余者曰盍宣諸詞以舒其悲余旣無以自解乃述哀衷而寄奠曰伊河洛開吾宗之源兮入西浙而派分世種德而累仁兮紛內美而脩能三台孕秀而鍾祥兮迺佑啟於後人嗣吾弟之始降兮屆昌裕之嘉辰表文明於威鳳兮侈聖瑞於仁麟傳一經於四聖兮諳詩禮於趨庭載五車於三冬兮煥綵筆於高文遂脫穎於鄉闈兮尋射策於楓宸旣簡注於巖廊兮亦流譽於縉紳託鎖鑰於東關兮念地阻而遺親寧疎逖於南天兮甘祿養以娛心除戎器於武藏兮掌三銓以持衡品藻允諧於庶職兮董正克振乎五兵旣黽勉於官箴兮尤兢惕於檢

身羽翮奮於漸鴻兮溫恭協乎謙亨胡禍善而天賢兮
奄膏銷而蘭焚鄙余浮沈於冗賤兮再握符於陽平弟
方奏最而還轅兮暫把臂於衛濱折津柳以牽思兮傷
朔雁之離羣風雲期盛世之績兮湖山訂晚歲之盟胡
在耳之未忘兮竟永訣於云云嗚呼哀哉繫白髮之在
堂兮遺弱息之零丁悼孝友於九族兮懷仁厚於鄉評
悠悠旅櫬歸何日兮山城鬱鬱故壠藏何處兮幽局恨
撫棺之靡及兮時浪浪以沾襟媿脫驂以爲賻兮聊束
芻以寄忱諒有知能諒余兮庶來格於冥冥

祭顧方伯六泉文

維天之道虧益無私維聖之訓禍福有基常理如然今

也何稽謙謙君子展矣醇儒開芳振玉實懋聲蜚脫迹
鴻達筮仕雲司遵彼三尺詳於五辭出守清漳千里保
釐仁澤覃被清譽遠馳乃持邦憲文教敬敷起衰崇雅
雨化風熙翱翔藩臬秦楚雲霓四國是式一節靡渝載
陟東省漸騁天衢胡弗少延隆棟遽摧豈厭溷濁潔身
全歸抑有定命脩短莫移殃善覆栽厚積薄施天誠難
測理亦難知國嗟矜式鄉悼表儀矧我姻契誼重心悽
陳詞侑觴敬祖靈輒冥冥不昧洋洋格思

祭孫柳西文

猗與封君周文之裔散處吳中雲間流寓明興驅逐編
戎入蜀歷世累仁含光守璞或宗夢得蘊藉詩書或承

思邈醫隱閭閻迨公崛起克濟世美庶人在官冠服是
被流賊紛擾所過靡遺義激諸鄉宣揚武威萬家如堵
五里無虞粵歲戊子綿漢大侵弃殍載道泚頹酸心關
地給力惠沾枯骨冥漠有知何以報德篤生令子蚤奮
天衢詳刑西省剖竹邦畿巖廊重望朝野清譽惟帝念
功推本自公龍章再錫進秩薦隆鼎養方盛生榮未旣
胡然厭勞奄忽仙逝嗚呼哀哉魄寢柳西訃聞恆獄君
侯奔號士民悽愕嗚呼哀哉掩骨曰仁禦難曰義陰隲
旣厚明功亦試輝煌紫誥亦旣食報榮壽及稀繼述克
孝桐岡鬱鬱佳城屹屹梧月松風相將窀穸生順歿寧
胡弗安懌某託交令子誼忝同遊仰德有日執紼無由

誠無不格我心悠悠

祭劉安人文

毓德世族夙稟淑姿作賓賢雋式愼壺儀蘋蘩禮肅琴瑟家宜佑翼鵠舉奮迹天達翱翔郎署澤國保釐載陟臨邛邦憲是司敷歷中外靡往不隨處貴思約不驕不移事無攸遂勞罔內虞人知克相帝鑒孔微翟冠象服玉燦金輝躋榮方茂食報未幾胡天不融乘化遄歸蜀山巖巖易水瀾瀾夫君嗣子目慘心悲某等分同寅雅情共淒其遙將薄奠陳此俚詞

祭張封君文

紹世德於故家聿潛脩而誕發浮菁華以藻飾湛禮義

爲輓輓贊郡政兮爲郎眇覽試兮雖末蚤厭寵樊超然
蕙脫盼桑梓兮徜徉孕桂蘭兮芬馥多畜啟兮詩書義
方授兮英傑尋挺出乎白眉侈大來之朱紱譽振兮雲
司名聞兮鳳闕恩錫褒封兮輝煌綸綍養遂鼎裊兮委
蛇閎閱舞筵翻兮編衣省闈駐兮憲節正悅豫兮未央
胡嗟生兮大耋某等託交令子訃傳悲咄遙致薦兮芬
芳望冥靈兮淪忽

祭蔣僉憲環山文

嗚呼士君子寄形宇宙凡砥節礪行確不可拔者心能
自盡其顯晦得喪紛不可定者勢固難必是故隱約能
安盛滿不溢惟順應之不遷迺御動而常逸嗟嗟環山

胡然不憚蚤脫穎於衡茅飄仁風於劇邑繼鳴珂於郎署懷紀法之脩飭爰秉憲於滇南再分符於川北侈彼豸繡舒我胸臆方將屈指功名等之何有詎意轉盼妍媸如斯莫測夙以虛羸因之憤抑貽戚孔多返真何亟果自信之過高豈未達乎通塞嗟嗟環山胡然罹厄諒有生之脩短本定命而不易信有來其必往總生勞而死息悟萬有之皆空奚隨感爲欣戚惟有子爲不死惟令名爲不忒永以慰於沒寧亦將解於生惻

祭周母文

夫女德不外見不於其夫則於其子是以表坤順者與其承乾式母儀者本諸賢士惟茲純懿夙成於名家作

配克嫔乎前美蘋蘩知婦事之宜紈綺戒冶容之侈夫
君得助而內顧亡憂嗣賢有託而忠勤是矢已迺倦遊
節鉞奉鼎俎於北堂競秀芝蘭娛桑榆於錦里方永日
以祈年胡珠沈而玉毀余輩服官巴蜀久企家風傷素
娥之歸月慨婺曜之隕空遙將牲醴用寄哀恫

祭李封君文

太行璞韞沁川珠耀誕發清標世德克紹總角攻文弱
冠味道彊記博聞精研深造飛藻奪目說詩解頤鬢宮
萃拔月旦里推自勝者學不偶惟時晚膺賓薦實匪心
期幡然龍伏後人是啟明允名家長公濟美甲第英聲
掖垣芳軌朝無闕事告有嘉猷蠶叢遠使澤滿西陬孰